

上清太上黃素四十四方經

既六

太上大道君玄靈秀虛維任上化理會千真
參謁十方乃擲攝八帝隱浪晨征誅滅六天
正立三道威鋒霄落流煥萬仞於是乃命太
極真人四司上宰臣侍玉晨啓正丹素之

高章伐滅寒靈之法化遂開八會之上道科
條神仙之要衷凡四十四方合而成目總爲
黃素之書遂封以丹藥之篋盛以玄靈錦囊
付仙都左公藏於七瑛之房又命北寒玉女
三十七人常衛於有經者之身依四極明科
使七百年中得傳三人

太上黃素四十四方皆九天之上書八會之
隱文也是以太上道君命上清高仙太極真
人科集品目陳其次序合爲黃素神方四十
四首是伐正六天之後共所衷立也此之篇
章皆出於高聖之命注於上宰之筆故道備
太真妙冠衆品所謂三天正法威馘六天之
凶炁伐滅千妖之不祥
夫有宿命應得見此文皆玄挺開會必有神
仙定分也此之神經不傳於世道說之者則

三天判姦上聞帝君告子之罪以爲宣漏之
愆盟也將末三年太上使五帝神兵罰子身
矣死爲下鬼七祖父母同考水官
凡受太上黃素四十四方經師及弟子各齋
四十五日不交人事先啓告神明審可付者

然後盟傳盟用玉札一枚長一尺五分廣一
寸四分以跪四極上真之盟又用黃素四十
尺金錄兩雙以代軟血散宣之約若受經之
後犯約愆盟傳非其人罪同於上記見罰於
神兵也兆慎之哉太上道君命太極真人侍
宸上宰共撰黃素神經四十四方如左

凡讀大洞真經三十九章能通釋微音談無
暢玄窮究幽深攬讚靈章弘音震響妙理旁
通隱誦寂室琅然無滯若此人者皆上仙之
才也然讀此之經故能提攜太上攝命九真
高仙同品司命齊備依太上黃素四十四方
便得稱爲大洞法師大洞法師真稱無族監
虛領玄通神接微光生萬真位准太極上仙
此謂精研密感非萬徧之限也若但有此經
不學之者又不隱誦亦得爲太上主者之任

及爲鬼神之師君也
凡讀太丹隱書金華洞房及唯一寶章者能
浪味玄真領理洞經幽悟冥途逸浪虛庭觸
類無滯希真篤誠陳聞寂室密願通靈者其
人或精感太素陟降九真五神混合司命錄

篇依太上黃素四十四方便得稱爲三洞法
師及元景真人元景真人位准帝一高仙帝
一高仙監虛上無爲總神之上真也若子但
有此經未能研感者亦自得爲三元主者及
受地上陸仙之任矣

凡讀太丹隱書洞真玄經及帝一解結哺養
百神之事者能精研密感通玄達靈迴精玄
元開散七經理幽琮滯味景霄清其人玄簡
帝牖圖景三元精微神明感會龜山依太上
黃素四十四方便得自稱爲玄洞法師上景
真人上景真人位准九宮上仙大夫如此之
經故能大混帝一領括五神九靈侍宰三官
司臣矣若未能研修其事者亦自得爲三天
主者地司之上任矣
凡能精進三經說解奇文蕭浪上契耽味玄

遠者其人皆必瓊書秀簡金籍玉名或受書之始見授靈人因緣或遇會此總忽而得之得此之經皆太極試觀察子誠向品會高下故已陳於未授之前矣不必盡崇盟師為軌血之約也依太上黃素四十四方便得自稱為總神法司上景先生及九玄大夫之號若勤會上感瓊音密嚮萬徧既周雌雄亦混即便乘雲駕龍白日騰虛上登三清得為太極公卿及高仙之上任矣

凡得太上龍書太真道經及玉清隱文玄羽之章能通微釋玄判疑喻幽傍讚妙理觸類萬成放志晨宵仰味遐清者其人必有金書玉錄瓊簡帝室玄真郁浪清虛淑穆若此才者皆必上仙也依太上黃素四十四方便得為三天法師太上真人太上真人位准太極仙卿若但有此經則三官奉侍四明司臣萬向皆合試觀不陳後鬼通靈必獲地真也凡精試密向耽味玄真清齋若至感慕神仙忽自過此三品之經而不師受者其人皆玄會宿感列籍帝鄉真人有密授應得此經其

人異挺以標世功依太上黃素四十四方聽得隱盟玄誓神科也當以甲子之日清齋入室夜半生炁之時眠坐任意臨目髮髻叩齒二十四通心拜四方畢微呪曰

太上九靈三素元精仙都大神四極三清昔

奉法化遇會上經玄師冥遠靡覽真形乞丐

隱盟誓以神明玉童侍衛玉華扶生八願九

合妙慧通靈願神願仙飛行玉清呪畢又叩

齒二十四通嚙液十過心拜經前因此而寢

亦可起坐誦經必有吉感常能行之三年之

中得為經師成其真人大夫之任矣此是黃

素內法不煩復經營師及唾血之盟也真人

雖已受經亦常行之

凡受大洞三經法當隱靜別室不雜俗人并

淨寫一通以為机上之書常當奉以燒香又

別施東面一牀以安机也此禮願之時皆對

席行事其可誦讀之經不得參於机上也凡

為道士受三品真經雌一洞玄隱玄羽章當

勤慕上契感會神明精心齋淨專道固生致

致不替味景玄清若此人者必獲上仙依太

上黃素四十四方得行八朝三朝內禮隱法當以甲寅戊申庚申丁巳巳巳癸亥乙亥之日平旦入室燒香左右臨目髮髻叩齒二十四通心拜四方微呪曰

太上太靈三素元精謹以吉日內朝真經神

重玉女散香虛庭使我神仙天地相傾呪畢

疾閉兩目使內外冥合不相聞見又叩齒三

十通嚙液三過開目都畢也此名為八朝三

元內禮隱法常能行之令人通靈徹視精應

三元真會妙感陟降太玄侍經玉女奏子求

生神仙不死天地相傾諸未受經者行之三

年得為經師靈瑞吉祥

凡修受大洞真經雌一奇文者皆當別寢一

室不交人物常置經於机格潔淨之處旦夕

燒香禮拜陳願人間內除罪籍常以月三日

七日二十一日侍經玉女乃奏人罪過於三

元與太一帝君共詳子之云為也是其日也

當入室燒香叩齒三七通微呪曰

太上神方大洞真經昔以有幸適遇神明啓

蔭七圖受會三清若有蔭罪帝君散靈三象

開明上帝合形令我飛仙神真長生呪畢又叩齒二七通心拜四方開目都畢常當行之者則三元密感帝君赦過諸有奏子之罪者皆不見用也

凡道士存思上法及修學太一之事皆禁見死尸血穢之物若此見之者聽得三光隱謝解穢內法當以真朱一鉢散內水中因以洗目漱口并洗手足畢入室正寢交手心上叩齒二七通心拜四方乃微呪曰

三元上道太一護形司命公子五神黃寧血尸散滅凶穢沈零七液纏注五藏華生令我神仙長享利貞呪畢因疾閉兩眼并恁自使內外冥合不相聞見良久覺身中小熱為候竟又叩齒七下嚙液三過都畢此謂三光隱謝解穢之內法也

凡道士修受上法欲有所看者誦讀經文發篋之時皆當燒香左右心拜經前啄齒三通乃微呪曰

玉帝上法上聞三清吉旨齋誠敢開神經萬試隱伏所向皆成玉童侍護玉華散馨上告

三元與我長生呪畢開經然後乃得誦讀之此名為大帝開經之法令玉女玉童侍守燒香啓降神靈上聞九天

凡道士受學洞經修行太一之事不得宣泄太一帝君之名字以語不同志之人泄則犯太玄陰考兆三犯之者則五神廢宅不得復為仙矣過三以往死為下鬼已無仙冀凡道士受經以後常晨夕存呪太一帝君之名字先叩齒三通乃微呪曰

受梵履昌七靈丈人太一務獸五神黃寧上昇九天與帝同并乞願飛仙七祖胎嬰解愆釋罪上登玉清呪畢又啄齒七通嚙液三過此為存神釋罪請帝求仙也行之七年則神明感會帝君喜歡玄母注生五神常存七祖罪釋受胎南仙長生不死白日昇晨

凡道士受學生法不得稱及死事稱及死事者則生炁變動不居於帝故死炁運入生神離棄是以惡炁遊尸陳其間孔矣將病將死之漸也夫受太一存五神修九宮混帝君者慎不得有所恚怒及願已之死也受經已後

言滿四十者皆不得復為真人侍經玉童玉女奏于於帝君以為奔生之罪兆必見考於玄虛受責於太上將未三年身必亡失此黃素之科太玄之法用

凡修受上法及行雌一太一之事兆所有經文皆當燒香禮呪以奉神明不得身犯滂慢并妄說經法以語不同志之人有此愆者則侍經玉童玉女記于之過上白帝君說語一人則損一玉童一玉女以還於三素之房過語三人則玉童玉女都去子矣或遭水火之

灾忽自失經或不覺而去若傳非其人則三天司命罰子之身死為下鬼長役水官此玉帝之科表也

凡修太一之事及行上法存神之道慎不可見尸及血穢之物見一死尸則一年不得行事有却傾一年之功然此帝一之科科常却罰於既往又進塞於將來若一年之見尸者則罰功斂事各三年也若過見二十四尸者皆不得復修太一求仙也

凡修受上法及雌一太一之事者兆身中三

魂五神之炁常薰於中服之中七魄九靈餘精常栖於履屐之下是以道士學生不雜席而寢故衣榻之服不借非已之炁履屐之物常惡土穢之薰亦不欲使雜人犯觸諸物以驚三魂

凡道士吐納統六和炁存神服霞修求長生之道慎不可食五薰之菜及為酒色之病敗也是故古之神人云五薰為伐藏之斧斤酒色為喪身之棺槨夫能斷斤斧之所傷塞棺槨之死宅者然後可以涉生生之塗徑漸神仙之蹊路矣

凡欲求畏恐常鳴天鍾於左齒二十六通先閉炁左嚔之叱叱五通常辟精邪惡物不祥之炁常夜寢臨欲眠時以手撫心三通閉目微呪曰太靈九官太一守房百神參位魂魄和同長生不死塞滅邪凶祝畢而寢此名為九宮隱呪寢魂之法常能行之使人魂魄安寧常保吉祥

凡傳授上法之時有經之師當先求感應然後傳之當入室燒香密願神明乃心拜經前

微呪曰太上元君仙都大神今日吉日八顧開陳欲傳其上法敢告靈元未知可否須應乃宣呪畢便寢必獲靈應子自知其善否之心審可授之方

凡經師授經之法先心拜四方以感神明為宗師之主餘乃執經起立仰天而呪告誓神靈以為玄科之約當說受經者之姓名并啓大神陳受經之品目為之科條銘策告誓合統六聖文傳諱而陳之呪畢弟子再拜跪受畢又再拜此真人告神之盟內法不必盡存割血為敢漏之約也

凡經師傳授之時皆當依如上法清齋別處不交人事啓告神明求諸密感爾乃傳之若真應橫錯所感非祥者此皆天靈顯根不使傳也若弟子不順神明違而傳之依黃素之科受子真考七祖魂魄長閑地獄身亦將亡統六仙安所冀

凡存修太一之事欲有所禮願慎不可叩頭此叩頭者則傾九天動千真神宮迴覆泥丸

倒懸天帝跪於上府太一泣於中田數如此者則存念無益三真棄宮七神漂散玄宅納凶是為太上五神之至忌也故古之真人但心存叩頭運精感而行事不因頰頰以祈靈也

凡修行太一之道真人道士不得有所禮拜亦帝君五神之所忌也若有所精思行禮願之時但心拜而已不形屈也自不修受上法者不得同於外學之夫矣

凡道士登齋入室忽有靈感妙應當有吉祥之夢者皆道之欲成兆當勤修若至感莫上會如是不替則真靈玉女將想子之寢矣卧覺之時當正身上向叩齒三七通閉目微呪曰上一赤子丹皇運珠太一帝尊疑天伯無七靈上感五神歸遊靈童玉女谿落雙符七星同昇上登晨丘祝畢又叩齒三七通嚔液三過閉目都畢此名為太一留神感會仙賢之呪也如此者三年則九天諸神及太玄玉女將降衛於子凡道士入室齋誠有存修而數有不祥之物

及奇恠血光諸鬼精惡炁來悉試人者兆當
行北帝祝鬼殺邪神方先叩齒三十六通乃
呪之曰

二象迴傾玄一之旌七靈護命上詣三清雙
皇驅除赫栢羅兵三十萬人侍衛神營巨獸

百丈吐威攝精揮劍逐邪馘落魔靈神伯所
呪千祆滅形祝畢又叩齒三十六通此名為
北帝祝鬼殺邪神方諸神靈正炁聞此之祝
皆來奉衛於子而向不祥之炁即得死滅

凡道士獨宿山林而多為山精惡鬼所犯試
者當叩齒二七通閉氣呪曰

吾昨被帝召攝領真元令我封掌此五嶽揮
割艷山山精萬靈受事俱會帝前七神啓引
三元司真若有小妖即時梟殘山精澤尉速
來奉迎神師口命上聞三清一如大洞之法

不得稽停呪畢又叩齒二七下此為帝君捕
神呪伐山精百鬼之法諸山神地祇房祠正
炁之神聞此之呪皆來執鞭奉迎神兵侍衛
若與萬人同宿矣
凡道士隱跡山林精思感靈或讀洞經發響

之時多為北帝大魔試敗於人兆每至昏夜
當叩齒三十六通畢乃呪曰

北帝大魔王受事帝君前泉曲之鬼四明艷
山千祆混形九首同身神虎放毒馘滅雷震
神公吐呪所戮無親太微有命攝録山川鳴

鈴文擲流煥九天風火征伐神鋒十陳究試
伏滅萬精梟殘妖毒敢起受閉三關請依洞
法莫不如言呪畢又叩齒三十六通此名為
三天正法呪魔神方常能行之則神兵侍衛
山川攝精千祆受閉萬試不干

凡修大洞法及太一帝一之事者常至黃昏
時入室燒香心拜經前因叩齒二七通乃微
呪曰

太一帝尊帝一玄經五雲散景鬱徹三清玉
童玉女燒香侍靈上願開陳與我合形使我
神仙長亨利貞呪畢又叩齒二七通此名為
帝一燒香開陳上願與靈合形之道也常能
爾者則玉華侍衛神靈輔真散鬱香雲上微
九天將來三年則玉女玉童都見於子矣
凡道士入室齋誠之時臨食當以左手持著

琢梓三過乃微呪曰

二玄上道四極清泠太一帝君百神黃寧受
粮三宮灌溉脾靈上饗太和食味五馨魂胎
之命七液流停百關通和五藏華明雙皇合
景飛行上清食畢又琢梓三過此名為鬼胎

受馨百神饗粮之道常能行之令人神明炁
和魂魄安寧辟惡除試常保利貞

凡道士理髮將髻及沐頭將散髮之時先啄
齒七通乃微呪曰

太帝散華玄歸大神今日吉日理髮沐塵辟
惡除病長生神仙呪畢乃髮髻畢叩齒七通
都畢此名為太帝散華理髮內法令人終年
不病耳目聰明頭腦不痛

凡道士入室燒香有所修願皆先啄齒三通
乃微呪曰

玉華散景九炁合煙香雲密羅徑衝九天侍
香玉女上聞帝前令我長生世為真仙所向
所願莫不如言呪畢心拜精念亦適意所陳
矣此名為太常隱呪散香九天降靈寢室願
會神仙之方也

凡道士行來獨宿山林廟座之間饒有魔精惡鬼之地當先咏齒三十六通閉炁微呪曰太帝陽元四維幽關千祿萬毒敢當吾前巨獸重叻割腹屠肝神公使者守衛營蕃黃衣師兵斬伐妖鬼滅千魔摧落山奸絕種滅

類取令集殘玉帝上命清蕩三元呪畢又叩齒三十六通此名為太帝揮神內咒塞滅萬魔之法常能誦之則神兵見衛萬鬼受事千祿死伏

凡道士臨眠解衣之時先咏齒三通立而祝曰受命太帝上昇九宮百神安位列侍神公魂魄和煉五藏華豐有體玄注七液虛克火鈴交煥滅鬼除兇上願神仙常生無窮祝畢又叩齒三通脫水而卧此名為太帝寢神滅鬼凶之法令人精明不病魂魄常存數有吉感

凡道士浴身及洗手面之時先臨水咏齒三通乃微祝曰四大開玄天地為常玄水滌穢辟除不祥雙皇守門七靈安房雲津煉灌萬炁混康內外

利貞保茲黃裳呪畢又叩齒三通乃洗沐手面此名為滌穢除凶七房祝法常能行之者使人神明血淨解諸凶炁凡道士夜行之時及有所畏恐心震之地叩齒二七通乃呪曰

吾是小有其王三天師君昔受太上神方殺邪之文夜行遊尸七惡妖魂九鬼共賊千魔成羣赫相圖兵巨獸羅千揮割萬杖當我即殘龍烽七獨逐邪無間玉帝神呪揮劍東西滅凶除邪萬鬼即懸三天正法皆如我言呪畢又叩齒二七通此名為三天正法除六天

之隱呪也鬼有被此祝者皆盲目脚殘自然死滅矣凡行來有畏之處但按如此不必須夜行事也常能誦之則萬魔伏試千杖滅形凡道士祝滅三尸之法常以月晦朔之日及甲寅庚寅庚申之日兆身中七魄遊尸諸血尸之鬼上天白人罪過自還中傷於身或遊走他鄉名呼外鬼協進為杖賊是以惡夢交於寢魂病皆纏於神室人所以惡夢疾病者皆七魄遊尸之所為也至其日常當沐

服燒香入室精念上慕不營他事以夜之生炁時或黃昏之時正寢東首接手心上先叩齒三七通乃微呪曰七靈五神八顧四陳上告靈命中皇雙真錄魂煉魄塞滅邪精血鬼遊尸穢滯長泯和我生關開我死門若有冥命聽對帝前使我長生劫齡常存太帝之法敢告三元畢又叩齒三七通嚙液十過都畢此名為太帝制魂伐尸神呪之法也血尸七魄被此呪者皆得滅於死尸之下魂明魄柔受化於三宮之中辟惡除病令人神明不死常能誦之則終身不厭味

凡存念上道呪除三尸之時常當採處白芷草根及青木香合以東流水煮取其汁以沐浴於身辟諸血尸惡氣亦常可和香燒之以致神明若無青木香者亦可單用白芷凡庚申甲寅之日是血鬼遊尸直合之日此之日也天炁交合七魄競亂淫穢混真邪精流煥明法勤津七神感散每至其日當清齋別處不雜他席慎不可與夫妻相見及同牀

而寢又不可爭競財色所行非道之方也每當燒香感氣修行之時誦呪之法亦可誦經混神若思洞房帝一之事唯使精真以為意也凡道士忽得不祥之夢或夢與人鬪爭或相收錄者此亦七魄遊尸之所為也或導將外鬼來入本宅或三魂散翳五神戰動或被束縛不得來還故使惡夢非祥將有禍敗之漸也卧覺之時即正寢上向接乎心上叩齒三七通畢微呪曰

九天上帝四門八靈七房二玄三素元精太一桃康上詣三清請告帝君攝命黃寧速召七魄校實神庭若有不祥七尸鬼兵從呼雙真流燭煉形太微大帝斬伐邪精三魂和桑血尸派零神歸絕宅觸向利貞使我神仙長保劫齡呪畢又啄齒二七通嚙液十過此名為太帝神祝辟夢除凶之法能行之者則三魂和煉七魄受制神明炁正尸穢散滅而向所呪之鬼即已受於地獄矣經三呪之後自非靈感吉應不復夢於非常矣凡道士禮願神明精思上法行諸隱呪之時

皆當燒香心拜密呪而已勿使得耳聞之也若欲呪伐六天滅諸兇鬼者乃可小發聲耳亦不得乃大高響使傍人聞解之也若讀誦之時乃任意耳

凡八節之日皆三天仙靈期宴禮會之日也

此修行禮願朝禮之時甘當齋用此日至於朔望朝禮非上法也

凡是其日欲行禮願陳呪之時當先叩齒七通心拜四方乃微呪曰

上清玉帝三素元君太上高靈仙都大神今日吉日八願開陳上願飛霄長生神仙中願天地合景風雲下願五藏與我常存次願七祖釋羅脫愆又願帝君斫伐胞根六願世世智慧開全七願滅鬼馘斬六天八願降靈徹聽東西上願一合莫不如所言願神願仙上朝三元呪畢又拜如初亦遼意所陳求解脫七祖之愆及首己之罪狀以續於行事之後也此名為三元八朝隱呪上願神仙之要法也行之三年七祖父母及己之罪都解釋矣然後玉華降衛感會神明八願開陳必獲靈

仙之要契也

右太上黃素四十四方是太上大道君正炁三天之法後撰集妙經以為科表也按此之經文神法真妙修生之人使得立用以治身也必驗之神方也自非三元秀簡帝圖玉錄者四十四方弗可染也此之神方妙絕於眾品籍隱於帝房傳授之時皆須高仙選品太極試觀再聞玉帝童奏太上乃得授之所謂三天正法連盟七世不傳於非玄挺質之子若不崇天禁妄泄玄法連盟之祖同開地獄身考水官仙可冀乎

上清太上黃素四十四方經